

四庫全書

集部

欽定四庫全書

兩宋名賢小集卷二百二十八

宋 陳思 編

元 陳世隆 補

野谷詩集

趙汝燧字明翁汴都人寧宗初登進士第授館職開禧丁卯被劾去官嘉定中起為鎮江筦權分司筦權舊用武目時更以文臣邑最之人汝燧預焉嘗蓄東

坡書少陵夏夜歎蜀人趙子雲畫李杜像及古琴一
張命曰三珍出入每攜以自隨有野谷詩集六卷

荆渚書懷

明鏡明於月白髮白於雪月照雪轉添使我心斷絕連
年事行役曾不須臾歇陟岡脚雙繭凌湖舟一葉五觀
君山面洪濤漲天濶重倚南樓欄遠雁逐雲滅西風落
破帽龍山酬九節搖鞭荆門去蒙泉弄清潔遊觀固不
惡奔走計則拙眼指數千里意行遂休轍困翻墮渚宮

因循入羈紲天涯寒苦早袖穿手龜裂村酤酒力薄連
醵耳方熱矯首飛白雲杳杳望吳越儒冠信誤身鑄盡
六州鐵

小山寺

披霧入野寺寒林響西風誰遣僧出迎山鳥為我通染
衣松露香照眼巖花紅聊此息塵慮歸騎毋怱怱

題王才叔南館

南館著隱士幽爽似僧舍島紅野花繁岸綠垂楊亞人

行鳥不驚客至鶴先迓林深自無暑月到更疑夜傾樽
對聖賢飛筆追鮑謝興來即散策無時不得暇

晚晴與何尹登水亭簡張丞

溪流兩岸秋日落千山暮一亭壓其間登覽洗萬慮胸
襟富丘壑方領此幽趣擲餌來潛鱗圍碁驚過鷺酒壺
展逸興漁唱續遠浦安得哦松來捫髭同覓句

訪隱者不遇

兩腋乘西風送我上高岑竹根一泉通石徑萬木森中

有隱者居敗屋莓苔侵山空人不見雲滿挂壁琴兩鶴
出候我逢迎啄衣襟應酬久頗厭走避不可尋誰伴山
下去明月升高林

翁媼歎

早

疑是早

曦赫空歲不熟炊甑飛塵煮薄粥翁媼饑雷常

轉腹大兒嗷嗷小兒哭愁死未死此何時縣官賦不遺
毫釐科胥督欠烈星火詬言我已遭榜笞壯丁偷身出
走避病婦抱子訴下淚掉頭不恤爾有無多寡但照帖

中字盤難豈能供大嚼杯酒安足直一醉瀝血祈哀容
貸納拍案邀求仍痛詈百請幸聽去須臾衝夜槌門誰
叫呼後胥復持朱書急急符預借明年一年租

耕織歎

春催農工動阡陌耕犁紛紜牛背血種時已徧復耘耔
久晴渴雨車聲發往來邏視曉夕忙香穗垂頭秋登場
一年辛苦今幸熟壯兒健婦爭掃倉官負私負一作索
交至勺合不留但糠粃我腹不飽飽他人終日茅簷愁

餓死

詩中不見織婦意似別有一首而遺之

荆門行

開禧丁卯被檄一相視荆門閫隘

去年曾問荆門途雞鳴犬吠民耕鋤搖鞭重來意慘淡
前日井邑今丘墟雲昏雨溢初堆碧四野荒荒人跡踈
深山扶藹皆露處骨肉蕩沒况室廬老農無力倚林卧
少定舉首來向余官人且坐待儂說未說涕泗先橫裾
老夫老豈識兵革忽見遠近皆賊奴懸崖絕壁魚貫進
飛鳥下上爭馳驅吾軍非是無身手未鼓棄甲先奔趨

時平廩帛官不計戰勝爵賞官不辜進怯鋒鏑退焚掠
賊既難堪堪汝乎歸來未暇正其罪官有金幣還招呼
老夫莫曉軍旅事但聞敗衄聲嗟吁我聽其言為蹙額
含悽獨下西山隅金蓮似恨殺氣繞蒙泉未洗血水枯
九秋半破明月夕照我孤憤行繞壁天子嘗膽方仄席
微臣敢作楚囚泣秋風一劍樓蘭國

古劍歌

洞庭湖漁人得古劍於網中張倅得之以遺予

時開禧丁卯春館於岳陽樓邊事方急

洞庭吞天天無風月印一鏡星涵空波心千尺光五色
漁人嘖嘖疑垂虹睨而視之寂不見舉網下罩追奇蹤
須臾雷轟怒濤吼鼓蕩六合天溟濛所得非魚亦非龍
炯然三尺貫當中肉銷骨立精氣融鏗鈞其聲韜其鋒
越砥稍稍加磨礪壯士見之肝膽雄雷煥已死不可起
有誰解識斗間紫人疑龍泉或太阿萬古凡劍空一洗
倚樓西北望邊城連月亘天烽火明隱憂枕上思請纓

夜半躍牀頭鳴夢中見告若有神吾價豈但直百鈞

一作金

吾勇豈但敵一人知君素有擊楫中流心誓當助

君報國萬里靖烽塵

去婦詞

入得良人門自誓終此身掃室擁箕帚進盥躬盤巾采
桑趨壠首薦蘋潔澗濱十年盡婦道惟恐堂上嗔上和
下睦本無事一旦小姑恣蕒菲浸潤既深貝錦成不棄
不出譖不已良人繼繼心自知父母之命安敢違舉頭

天邊指缺月暫缺須有團圓時君不聞章臺長條依舊
垂樂昌半鏡還復歸

瑤娥曲

一二三四月如眉積累如梳截半規玉斧晝夜修不徹
修伐疑當作成團鏡當空垂十眉有樣列象几梳裁春冰鏡

涵水瑤娥睡起拂菱花掃黛挿鬢雲繞指斂袂亭亭天
上粧環珮隱體璚琳鏘驂鸞跨鶴舞仙譜子登彈璫飛
瓊簧天風颼颼冷到骨銀河澎湃濺羅襪一輪千古廣

寒深折盡桂花應白髮

斷腸曲

凭欄日日望歸騶書來又報瀟湘遊
卷書默坐淚如雨
彈向花上花潛愁想郎快意揚州鶴
風光何地非行樂
妾腸寸斷郎豈知獨步苔階空聽鵲
風撼碧紗夜牕深
弄針燈下無心情蜀羅一段絨五色
看定鴛鴦繡不成
妾貌留春春要去粧鏡孤鸞無力舞
輓轡啞啞殘夢驚
曉嘶似是郎馬聲卷簾無人簾再下
遣童水東占打瓦

征婦歎

蓮浴雙鴛鴦梧棲雙鳳凰雙舞蝶度牆雙飛燕歸梁倚
欄人顰翠忍淚心暗傷閉戶簾幃悄孤燈耿空房欲睡
睡未得獨坐理絲簧彈吹不成調征夫天一方

寄遠曲

君馬踏邊塵繡幃妾一身仰天無過雁俯水無游鱗酒
難獨自酌蟻樽空浮春食亦不知味駝峯徒薦珍憶昔
送君君已醉醉言更成一年事兜鍪北去幾寒暑兩地

肝腸摧萬里別來容貌似舊無寄去衣裳知到未折柳
絲絲紫塞心對花片片青春淚夜聞琴瑟鼓鄰家人皆
齊眉老年華不忍恨君翻自恨長吁矯首天之涯幾度
虛傳歸信息愛聽乾鵲怕聽鴉孤枕有時髣髴夢中見
覺來霜角咽梅花

短歌行

赤龍駕輪飛上天倏東倏西晝夜旋流光萬古去不返
少壯翻手成華顛閭風層城羽衣仙方瞳綠髮耕芝田

玉樓貯春春不老蟠桃一熟三千年我欲訪仙弱水隔
住世奈此急景煎茫然無計相留連打屏萬事不放在
眼前左杯右蟹拍浮百斛船

漁父四時曲

春

霽江浮春新水肥鱗鱗鴨綠東風微波心上下舴艋滑
釣車香餌卷落暉纖鱗噉喁錦穿柳半留賣錢半換酒
爛醉茅簷紅杏花折花簪髮把兩手沙岸尋芳青驄嘶

彈絲吹竹挾蛾眉笑指漁父何寂寞漁父掉頭我自樂

夏

烟溪流碧浸炎空滌濯裨延蒹葭風大港小港涼世界
隔堤荷蕩香到篷儂家生長舟一葉豈識人間半點熱
青笠綠蓑山雨來雨過波平夜撐月水亭避暑冰玉肌
枕設珊瑚簟琉璃笑指漁父何辛苦漁父掉頭渾不顧

秋

新雁銜秋訪水涯分屯洲渚傍蘆花停橈相釣結溪社

來往無嫌同一家酒酣把笛吹村曲聲曳蘭花入山腹
釣竿到手萬事輕孰是孰非孰榮辱江樓邀月粉黛濃
簪璫嘈雜徹桂宮笑指漁父何冷落漁父掉頭我豈錯

冬

六花坼凍雲模糊釣鉤空擲寒無魚繫舟枯柳歸茅舍
撥火煨新擁地爐賒鄰一榼醅醺玉老稚分霑春回谷
重來解纜放夜筒橫風打向別港宿溪館對雪歌妓圍
金山駝峯酒羔兒笑指漁父何憔悴漁父掉頭但稱醉

飲通幽園

典却上身鷗鷺裘買酒領客尋清遊欲洗胸襟塵萬斛
快上青雲展秋眸晴沙翳天風動地挈壺卷席移通幽
一奩鏡淨清可掬千竿玉立塵不留拒霜兩岸花爛漫
紅蓼錯雜爭開秋人生適意未易得癡兒了事何時休
陶寫豈必在絲竹山有鳴禽水游鯈酒酣題蕉競新句
景物辟易困雕鏤一梳涼月挿空碧樓頭暮角催歸騶
雙桂餘葩尚堪摘便道肯訪勿剪不

贈隱居

遶屋垂垂柳當軒小小江買漁尋晚釣浮蟻倒春缸山
近雲侵座月來柳映牕隱居誰似子不羨鹿門龐

倚樓

蒹葭秋色晚百尺倚江樓日暗烟藏寺風高浪拍舟歸
雲投遠嶺饑雁叫滄洲心事非年少塵埃白盡頭

舟中

繫纜停征棹斜陽古渡頭風霜先遠客天地獨扁舟水

鳥衝開浪汀鴻占斷秋在家貧亦好何用出林丘

夏日普信寺江閣

到此全無暑虛欄千里風看飛雲渡水聽落石鳴空日
月忙烏兔春秋遞燕鴻一生塵裏過烟艇羨漁翁

過寶雲寺訪密師

寺纔二三里曳杖且徐行晴塔松梢見風鐘嶺半鳴樵
夫分道過僧子就房迎竹有千竿立塵無一點生

信步

午牕方睡起信步過東畦穴徙蟻知雨巢穿燕補泥路
埤連草沒果重壓枝低村婦抱兒子籠邊教喚雞

送彥東還湘

湘南多爽處羨子片帆還秋影清涵水烟痕淡著山蘭
風香楚珮竹淚冷湘斑見說誅茆地江頭只教閒

宿方家店

昏暮方投宿敢嫌茅屋低池深月易入林密鳥爭棲買
酒春筍甕求蔬夜摘畦路長莫貪睡囑僕早聽雞

暮行江上

江天詩眼濶沙岸暮扶藜風怒來帆卸林昏宿鳥迷問
魚前港有沽酒小童攜夜客留同飲添杯剪韭畦

遣興

愁來無可奈散策小橋東影轉松隨日香殘花怯風烟
霞詩興裏天地酒杯中本是江湖客生涯付釣蓬

次莊過荆渚以詩寄之

澤國遙千里風帆隔兩州醉行沙市月吟破渚宮秋魚

歎馮驩缺貂殘季子裘人傳君入蜀無事早歸休

劉簿約遊廖園

名園新整頓尊酒約追隨春晚花飛少牆高蝶度遲
注湯童煖酒拍案客爭棋寂寞鞦韆索無人盡日垂

秋夜懷歸

鄉里千山月塵埃兩鬢星秋聲雖是爽客耳不堪聽
多淚風前燭孤明竹外螢吟蛩更無賴終夜幾曾停

宿古寺

黃昏投寺宿古屋瞰荒江村酒沽春甕山房耿夜缸灘
高聲撼枕月落影收牕僧老人皆翫樓鐘曉未撞

舟中

離家俄十日千里獨衰翁篷響過雲雨帆開逆水風新
沙增岸脚小港隱蘆叢客思難消遣黃昏月一弓

東村

晴久全無雨溪乾半是沙風橫分雁陣日轉起蜂衙地
僻草埋徑籬摧菊卧花橋西一林竹蕭洒兩三家

醴陵道中

入得湖南界皆嫌堠子長
烟巖松葉暗風陌稻花香
橋斷人迂路車鳴水卷塘
宿程雖不遠木杪已斜陽

日融

日融風力軟曳杖獨逍遙
蜂去花心靜鶯遷柳影搖
一年春易老兩鬢雪難消
客至時留飲無緣特地招

范園避暑

六月暑如炊追涼此地宜
棹舟荷柄颭坐石竹陰移
籌

貫壺雙耳鼎烹茶一旗小童供筆硯醉客競賡詩

常山道中

寒謝春纔展怱怱二月中筭來晴幾日多是雨兼風
烟草迷春碧山桃夾竹紅浮名能役我策馬幾回東

夏夜

今夕暑差甚芒鞋階下迎除燈簷月上却扇竹風生病
骨坐難久靜吟詩易成夜涼思睡去樓鼓已三更

乍晴

日色今朝穩園林二月中池塘展暗綠桃杏鬪春紅犯
險升高徑扶衰藉小童黃鸝怕人見飛過野橋東

江閣夜

小閣臨江迴疎簾帶霧鉤雲鴻遙影滅灘月碎光流詩
思偏宜夜衰髯不耐秋漁燈三兩點隱隱荻花洲

聞舟中笛

橫笛秋蓬底街山夕照殘孤音起水面餘韻到雲端吹
怨蘆聲慘含淒雁影寒有人江閣上斂翠憑闌干

過曹家渡

數篙撐過渡雨後水添肥
山橘青迷樹野花香襲衣
哀鴻悽遠客鬪雀墮斜暉
童稚喧林壑牛羊箇箇歸

早征

店雞一唱接疎鐘起整行裝
尚夢中沙路踏殘征馬月
柳隄啼斷曉鶯風水肥渡險
添舟子岸沒途窮問牧童
千里鄉人逢陌上片時握手
各西東

縱步

久雨厭人妨野步幾時便得此番晴到橋喚僕來相助
過寺逢僧約共行籬落一團飛蛺蝶汀洲數點立鷓鴣
農家竹裏深深住風度茅簷紡織聲

題合江亭

石鼓山頭一小亭乾坤萬里眼雙明雖因刺史能尋勝
不遇昌黎豈得名衡嶽雲開天洗碧蒸江湘合水爭清
書巖莫辨當時字空積塵泥野草生

昌黎有題合江亭
寄刺史鄒君詩末

有願書岩上石勿
使塵泥浣之句

崇真觀東軒

東軒水面枕山阿左右雲烟濕翠蘿
風度鶴聲聞遠壑日移松影轉前坡
愁來獨靠清尊遣老去休憎白髮多
道士罷琴揮醉筆詩成自喚小童哦

黃幹見約小飲就宿

病後何人慰寂寥長鬚持簡忽相招
溪山見說為樓爽杖履寧辭去郭遙
柳絮一天晴舞雪松聲十里夜聞潮
談詩直到踈鐘動酒困頻將茗椀澆

懷亨父

兩年隻影瀟湘去料想塵埃白髮侵久雨千山秋得意
西風一雁客關心或於夢裏陪談笑每向人前問信音
憶昔賡詩岩桂下花開今日歎孤斟

題會稽用林帥侍韻

東越乾坤到眼邊亂雲連壑草迷川五更城落千岩月
萬頃湖開一鏡天鼓角聲殘秦望曉樓臺影濕卧龍烟
舊時太史登臨處每想風流為慨然

登樓

地卑梅雨濕氣壓篆烟低孰是披襟處高樓百尺梯

苦吟

幾度燈花落苦吟難便成寒牕明月滿樓上打三更

尋勝

老子攜筇杖小童挑酒壺徧尋泉石勝引路倩樵夫

傷春

飛蝶捎風絮鳴禽戀午簷不知春去未但見柳陰添

半夜

坐久香消篆更長
燭屢花一輪觀
浴兔兩部聽鳴蛙

山寺

樹暗常疑夜
山多易得雲
撞鐘最深處
嶺外不曾聞

題莊舍壁

水深荷較晚
地僻草偏多
佇立風前聽
樵夫隔隴歌

後圃

澆花惟要早
芟草不知名
新竹生來巧
南塘補數莖

秋夜

秋到情懷惡美人天一方夜深牕轉月夢斷角吹霜

夢回

春意已深寒未了夢回斗帳房櫳悄五更五點殘月消
山鳥一聲先破曉

倚闌

倚闌有恨無人說暮角吹梅寒聲咽急風卷雨過鴻驚
吐下蘆花一枝雪

兩宋名賢小集卷二百二十八

欽定四庫全書

兩宋名賢小集卷二百二十九

宋 陳思 編

元 陳世隆 補

東閣吟稿

趙汝回字幾道永嘉人太宗八世孫嘉定七年進士
終主管進奏院

杜子墅留別

有朋不貴數道合意自親早知離別難會覲豈厭頻青
燈書閣下細語交情真酌此武陽泉饌彼松江鱗公庖
復有攜得非知我貧如何不我醉明日隔征塵

漁父

衡嶽早來雨湘江增綠波小舟浮似屋香草結為蓑水
定見魚影夜清聞櫓歌悠悠百年夢醒少醉時多

送李寅歸里

憐君竟不偶每事與心違南雪歲將暮西江帆獨歸停

薪待官米借宅共僧扉
吾老慙為吏相期尋釣磯

東山堂

謝守登臨地今為博士居
由來好山水常得近詩書
洞與衡嶽接泉分玉井餘
年年為吟事春草不教鋤

呈水心先生

鶴骨雖癯髮未斑
秋風鷗鷺共脩閑
芙蓉夾徑纔過馬
楊柳沿池不礙山
外稿定於何日上
中興只在十年間
穀城片石無人識
胡騎堂堂出漢關

鴈山

木葉新時雨亦晴山中少駐不妨程
童嫌路峻頻癡坐僧喜岩幽每促行
草蕩春深無鴈到松林月上有猿聲
石屏一帶三千丈可惜題詩又不成

山中即事

白日荒荒過不知茶蘼開了覺春歸
山家賣笋櫻桃熟河水生萍柳絮飛
久雨一晴螢火出閨年三月杜鵑稀
沉沉松竹烟嵐冷慙愧高僧借袷衣

峨眉山解

褐衣蔬食苦吟身
肌骨雖清鬢雪新
栗里未營三畝宅
桃源已過一年春
也知官職難癡望
化得妻兒不許貧
別寫新詩寄鄉友
峨眉山下獨閒人

宿羅溪山

鷺嶺東游霽景微
碧桃花外一鶯飛
樵夫不斫垂潭樹
知有僧人掛搭衣

二月十九日

客去關門讀莊老燈花熠熠春蟲小冰雪未消雷雨來
長安三月行人少

兩宋名賢小集卷二百二十九

欽定四庫全書

兩宋名賢小集卷二百三十

宋 陳思 編

元 陳世隆 補

安晚堂詩集

鄭清之字德源初名燮字文叔鄞人少從樓昉學能
文為樓鑰所稱賞登嘉定十七年進士教士峽州帥
趙方嚴重許可視清之獨隆重命其二子范葵出

拜且掖清之無答拜曰他日願以二子相累湖北茶
商羣聚暴橫清之白總領何炳曰此輩精悍宜籍
為兵緩急可用炳從之號曰茶商軍後用果有賴
遷國子學錄丞相史彌遠密語之曰皇子不堪負荷
聞後沂卽者甚賢君善訓迪之事成彌遠坐卽君坐
也言出於彌遠口入君耳若一語洩皆族矣卽除清
之魏惠憲王府教授俄兼太學博士寧宗崩彌遠入
定策詔旨皆清之所定理宗卽位累遷參知政事及

同知樞密院事彌遠卒命清之為右相兼樞密使帝
時親總庶政清之亦慨然以天下為己任召還真德
秀魏了翁崔與之李埴徐僑趙汝談尤焞游似洪咨
夔王遂李宗勉杜範徐清叟袁甫李韶時號小元祐
又旌異遺逸劉宰趙蕃輩端平三年以雷變請祠嘉
熙二年封申國公四年賜御書輔德明謨之閣賜楮
十萬緡為築室乃日與賓客門生尚羊山水間淳祐
四年進封衛國公五年進封越國公拜少師賜第西

湖之漁莊進讀仁皇寶訓謂仁祖之仁厚發為英明
故能修明紀綱而無寬弛不振之患孝祖之英明本
於仁厚故能涵養士氣而無矯厲峭刻之習蓋仁厚
英明二者相須帝褒諭之七年以太傅右丞相兼樞
密使帝以邊事為憂時趙葵以樞密使視師陳韓以
知樞密帥湖廣清之力主之科降辟置無留難於是
泗水渦口木庫之戰皆捷諸路虧鹽執其事者破家
以償清之覈其望誤者悉蠲之全活甚衆又進十龜

元吉歲帝命史官書焉卒引薦趙葵使居右相帝從
之葵亦不果來兩拜太師辭閣門給扶掖二人再賜
玉帶以疾累乞罷政拜太傅保寧軍節度使充醴泉
觀使進封齊國公致仕卒特贈尚書令追封魏郡王
諡忠定

默坐觀成

洹河見水老如新此見云何別妄真心本佛心須作佛
境皆塵境莫隨塵空中花果浮生眼夢裏悲歡現在身

萬事盧胡喫茶去不知誰主更誰賓

低頭莫莫更休休老去浮沉一敝舟
病惱幻軀天惡劇醉尋熟睡我先籌
眼前勤惰書開闔牕下陰晴雨散收
假使莊生夢為蝶也應貸粟監河侯

睡魔勾引鶴投林書債中拋筆似瘡
尚有烏髭羸白髮擬尋朱汞養黃金
寸機解起千疆畝一息能藏萬古今
塵世何人是知己推牕明月正當心

追記覺際偶成

我到家山雪尚飛
看看寒食展歸期
花開無酒蝶貽笑
春盡不吟鶯有辭
牕下竹君陪晤對
手中杖子共追隨
閒來自唱無生曲
井底泥蛇舞柘枝

靜極

磨甑豈解成明鏡
打坐如何作佛身
靜鬧頭頭須認着
暑中冰凍雪中春

燈薪

小草虛心不染塵
傳燈會上屢焚身
光明一點元無盡

欽定四庫全書

兩宋名賢小集
卷二百三十

漫結空花作好春

臂疼醫令灼艾戲成

幻體當如泡影觀法身清淨本堅完四千八萬陀羅臂
艾炷教君何處安

食豆莢

西風撼撼草蟲鳴萬莢叢中詫瑞莫煮啖快輸兒女吻
燃其不忍尚堆青

臂疼自砭

雲長鑿骨未為奇
斷臂亭亭對祖師
萬法從心當自省
箇中冷暖有誰知

有感

子思問學惟誠意
孟氏工夫只反身
定慧妙明何處覓
要知儒釋共天真

秋色佳甚未能一到覺際像景漫賦二絕

秋光淡薄有無間
掠水斜風雨脚斑
試向菰蒲深處望
嫩黃一點荇花閒

藕花萬柄斂春粧
賸駐霜荷葺芰裳
水路想通漁艇入
我來月下要鳴榔

感風悶坐戲成六言一首示雲岑

夢覺無兩莊子是
非只一東坡顏淵
簞食為樂啓期帶
索行歌魯侯不遇
天也伯寮其如命
何世事如碁新局
人生落葉辭柯誰
人見張平叔何處
覓藍采和且服單
方妙藥般若波羅
蜜多

秋成風雨

垂垂金穎賀秋成去逐狂風一羽輕何事天工惡戲劇
眼前翻覆見虧盈

雨後閒坐偶成

秋霖得曉晴景色似郊坰山向閒中碧雲從闕處青簷
牙留宿溜木杪掛疎星一枕便高卧清風入暑櫺

兀坐

夜聽寒蛩曉聽蟬梧桐疎雨晚秋天空齋抱膝元無事
半是癡憨半是禪

香山老惠兩貓

殺活禪機本自由
順行逆用總先籌
伽黎親抱狸奴送
管是南泉是趙州

香山貓食粥

梵宮新遣兩狸奴
晨粥饑餐食肉如
料是伊蒲三昧熟
未知遶膝許無魚

冬瓜

剪剪黃花夜後春
霜皮露葉護長身
生來籠統君休笑

腹裏能容數百人

茄子

青紫皮膚類宰官
光圓頭惱作僧看
如何緇俗偏同嗜
入口元來總一般

贈李相士

未遇公卿儘好看
會將碧眼炤人寒
邯鄲夢覺君休問
試卜何時可掛冠

七月初五日城中大風雨

颶風超海撼官城吹斷銀河徹曉傾瓦陣飛翻千鵠起
履聲旁午萬蛙鳴駢肩重足人如醉湧溜奔雲氣未平
誰與箋天如帝律毒龍斥去鎖東瀛

聞覺際被風寄頤老

古德把茅惟蓋頭颶風飄屋等虛舟矮牕猶有蒲團滑
也勝牀頭滾雪球

督覺際蒔菜

秋後從來數晚菘自鋤稀甲幾多叢莫辭楮楮頻攜甕

準儼清饒玉糝翁

偶記賦王昭君漫錄之

因覽詩話中賦昭君者命意多溺於情遂出此作

伐國曾聞用女戎
忍留妖麗漢宮中
如知獲姁貽周患
須信巫臣為楚忠
青冢不遺芳草恨
白溝那得戰塵空
解攜尤物柔強國
延壽當年合議功

八月初五夢挑杏枝上皆小藥頃刻間一花先開
既而次第皆拆色殊紅鮮可愛夢中為賦一詩

天孫紅錦淺深裁為惜
方苞未肯開爭奈東風披拂甚

枝頭次第吐香腮

贈談命陳總屬

彈鋏朱門歲月過生涯安樂徧行窩
談天有口機關別處世無心笑語多
自是君平忠孝在其如曼倩滑稽何
一帆又作鷗夷去遙想江湖聽踏歌

八月上弦夕

輕風熨貼晚雲開為放中秋半月來
待得月圓多值雨不如今夕共樽罍

覺際閒坐紀所見

蛛網雨中時恤緯蜂屯衙後自嬰城竹根得土筍爭長
紙隙受風牕善鳴

食蛤戲成

滿殼濡潮汐因沙產海濱文身吳太伯緘口魯銅人雀
化宜分雋蛙烹肯擬倫

蛙大者名風蛤

試呈饗賦手半熟酒含

津

督覺際植花

桂後秋蘭解出奇幽香元不許春知移根好向他山覓
承受風光到竹籬

兄弟梅礬是水仙曝根向暖種宜先銀臺金盞惟須酒
不可無渠對雪天

催覺際植芥

淡交耐久最宜蔬風味清嚴莫芥如沃壤深畦須早計
雪中滿擬飫冰藟

觀書

連日脾胃不快
因觀書遂喜食

肝脾何藥解清虛不用參苓不咬咀一種單方無授受
明窗端坐只觀書

夜雨

依風急雨墊秋清疎數無時總有聲最是可憐雲裏月
幾番陰翳幾番明

睡起戲筆

范蠡功成便五湖鴟夷未了復陶朱爭如終老嚴陵釣
千古清名一事無

欽定四庫全書

兩宋名賢詩集
卷二百三十

謝天童老秋蘭

楚畹春曾汎曉光
直留雅艷到虹藏
山中不把一枝到
世外那聞千佛香

秋色追隨入慧光
肯攜幽卉問行藏
深林未省炎涼態
來為閒人特地香

綠葉青青

音菁

帶紫光

經有紫金光聚

拈來笑處沒遮藏
密圓應

具楞嚴偈非木非空出妙香

夜雨不睡

浮沉世事付洪喬
欹枕迢迢度永宵
雨細無聲簷溜滴
香殘有燼篆烟銷
翻盆碩鼠全欺暗
遶鬢飛蚊始作嬌
老去易驚寒暑變
幾多今夕又明朝

少日無歡老易愁
鶯花過眼一春休
清虛未解窮肝釋
情思誰能更孔周
白醉暫煩簷送暖
蒼顏惟恐鏡包羞
爭如一點天然物
不共浮生作去留

育王老禪屢惠佳茗
比又攜日鑄為餉
因言久則味失
師授以焙藏之法
必有以專之笑謂
非力所

及漫成拙語解嘲錄以為謝

曾讀茶經如讀律一物不備茶不出未論煮瀹應節度
第一收藏在堅密摘鮮封裹須焙芳濕蒸為寇防侵疆
朝屯莫蒙要微火九轉溫養如丹房育王老慧老茶事
新授秘訣乃如此幾番惠我先春芽竭來細問茶何似
我初謂師茶絕奇十日之後如飲糜頗疑緇俗果異撰
良楷輒為居所移吾言未終師絕叫為茶傳法恨不早
綺疏應合有司存料理如前母草草對師大笑面欲闕

三年宰相食無腥長鬚赤脚供井臼荒寒正賴山人家
庾廖炊盡闕 吼何曾敲雪春雲走不如時扣趙州門
侍者可人長摸首

竹下見蘭

竹下幽香祇自知孤高終近歲寒姿垂楊漫舞多嬌態
倚賴東風得幾時

小軒偶成

齋餘宴坐息深深萬法皆閒境會心輕浪颭荷珠溜玉

晴曦穿竹翠籠金岸頭舟楫人歸語檻外菰蒲鳥去音
漫說陶車并謝屐如如不動勝登臨

舊冬得萋蒿數十根植之舍傍今春遂可採擷輒
持玆黃堂拙語先之聊發一笑

萋蒿見錄爾雅篇族譜系出荆楚孺居人採擷不論錢
橫道躡轢如車前物有貴賤所遇然雞壘承苓以常言
世間何有正味焉嗜芟昌歜性所便冰壺先生齋甕傳
敢驕玉食輕膏羶天隨酷謂杞菊賢一賦金石聲相宣

玉糝羹芋稱蘇仙天上酥酡能比肩憶昔客授湘湖偏
乍逢此蒿日流涎嚼寒冰玉香滿咽甘滑琉璃鳴貝編
糲以豚膏軟如綿脆甘豐膩潔且鮮天花石耳羞爭妍
木雞退飛山之巔笑渠芽蕨成兒拳岸視棹圃眉宇軒
七菹五菜誰敢先獨能兄事玉版禪一別楚產知幾年
孤根竭來植鄞川春苗出吐含曉烟援條小摘喜欲癡
故人千里方言還調羌酌之雙觥缸枯腸慰滿藜莧綠
食芥而美不敢專遣送兵厨羞俎簋噴飯一笑質當邊

太史報彗星沒

老彗妖芒欲熱天王良見迫為收鞭紫微一夜璣衡轉
甘雨祥風到野田

和趙從道賦菜畦春富貴

多生菜氣粥魚僧味菜還知好色登戲學挑根和露煮

正堪摘稻配香蒸

見誠齋詩

芝田不減商山樂蔬食誰言孔色矜

孔子見老聃云云去而驕志與矜色

蒲筍祗應維藪美鏤錫何必羨韓膺

送林教授行

戊戌九月

玉壺仙骨產蓬萊客授京璜雋武開曾向西山傳墨印

魯直墨以傳千古文章之印

好游東觀籀蘭臺青雲直上輕餘子黑

髮誰量未易才側耳韶簫充雅奏願同觀樂詫州來

石鼎煎茶午夢醒羊腸怕聽遠車聲剡舟忽至驚安道

漢使新招別子卿交誼從君知絕俗凋年如我最關情

鸞鳳先路為時瑞肯卜筵筭訴獨清

兩宋名賢小集卷二百三十

欽定四庫全書

兩宋名賢小集卷二百三十一

宋 陳思 編

元 陳世隆 補

安晚堂詩集

鄭清之

謝虛齋和詩

關心穡事恐春遲
暫許花風入繡旗
翠浪半天岐麥詠

玉簪數筍刈萁詩

見山谷過
土山寨詩

野亭寄韻追唐什

嚴鄭公
有寄題

野亭見
杜集

秋菊餐芳敵楚辭早晚催歸漢廷右西湖深處

樂天碑

和虛齋勸農十詩

迢遞層陰曉自開仙舟花底問瀛萊文章太守非游衍
為省春耕特地來

熱天妖焰芰初沉朝汲仁賢簡帝心未用鋒車便脂牽
小須千里徧春霖

蔽日寒雲悄欲秋
仁風載路曉光浮
田翁攬抱兒孫笑
竹馬橫陳未肯休

問訊桑麻真郡政
按行松菊似家山
挽回和氣歸田里
只費齋鈴半日間

暇日綦書六一翁
錦樞絲轡與春逢
年時豹尾車中望
山色有無知幾重

曉夢吟成望帝歸
征鞍未許柳絲知
笑聽鄭嶺春禽哢
去博延英午漏遲

酡顏醉客玉西東半濕塵衫上翠空鄒谷雖寒應解泰
朱車面面是春風

小隊旌旗半道歸松陰緩策攬清暉女郎未覺褰帷過
笑語相教看嫁衣

老點山靈具六通解將蒼狗護奇峯虛齋自有青囊眼
卻笑景純書未工

恰好農時踏翠烟睡龍驚起雨公田官程便作乘閒看
不用扁舟學計然

宿翠山

復與十里見青嶺行盡松陰得翠巖萬壑聲中清磬出
一峯高處白雲緘茶新煑鼎作魚沫僧有可人能塵談
自覺靈山緣境熟佛禪重問後三三

暖風依日佐山行幾許春隨履齒生溪舞綠雲苔出沒
田翻翠浪麥斜橫閒中適意榮三事歲晚無年式耦耕
一靜可能銷幻藥剎開胃次看崢嶸

和葺芷應直院送秋蘭韻

大椿凌千秋靈芝競三秀書傳通誇詡垂芳古今宙貴
耳但好奇相馬失之瘦誰知楚醒花遠避漢金酎擇交
得素節彼哉懷春誘夫君全德馨內美本吾有姑置芝
與椿秋蘭歲相壽

南坡口號十八首

十日南坡兩日晴晴時不放日華明春光似妬閒人佔
端的春風飽世情

天工忽忽度年光料理人間富貴忙閒裏何曾關造物

一分風景亦收藏

誰將春晚作冬看
添著綿衣減卻難
道是麥寒猶未
在
願渠麥熟且禁寒

休言無地起樓臺
十箇花窠沒處栽
東近比鄰西近水
且教紅白面墻開

欲識魚梁試作

則箇切

看輕拋野淥罩清寒
幾回瀉起空

無物輸殺羣兒下釣竿

吾孫宗子喜相遇
一笑檀欒似樂窩
且向尊中陪北海

直須閒裏識南坡

酷愛鳥鳴山更幽
牆陰風雨但飈飈
筠籠買得春禽語

不會憂時也白頭

近得白頭翁善鳴

管絃不礙登山屐
梁肉何妨滿腹書
豈是清談愧夸甫
為無阿堵遠吾廬

試向青池放小鮮
洋洋圉圉忽悠然
校人真箇知魚樂
殺活禪機總是禪

分席春畦僅一弓
靈根移自石窓東

五味子生於四明山

饒渠五

味誇仙藥爭似鹽梅僅策功

紛綸兒造信多才果解分風作去來我向南坡一旬雨
春陰今曉為誰開

小窗白醉篆香遲只有書君伴燕頤料得人間無此樂
殷勤獻與定牢辭

枝昂掛起一旬彊剪剪春風到柳塘白髮不公欺老我
偏於閒處引春霜

記得兒時誦古詩其甘如薺謂吾欺淡交休恨相知晚

攜向晶盤笑殺伊

曉來兩鵲屋山鳴報喜多應只報晴似為東皇傳好語
故留勝賞到清明

舊日都城飫子魚一鱗今不到茅廬果然額上通三印
盡去侯門代鯉書

安晚生涯冷似灰別墅經營半月迴誇與兒郎翁驟富
詩囊盈握送陳雷

紅紅白白共枝榮怪底山茶有寧馨倩得司花來判斷

不妨一姓養螟蛉

辛丑仲春同黃制屬自延壽雨過禪寂

復與掠雨到僧門帶得清閒一二分
素喜堂中無偃月
竭來寺裏作穿雲赤心莫逆惟松友
青眼相看有竹君
燒葉更聯東野句
紙窗鑽隙候晴曛

病後和黃玉泉韻

山扉連月款

缺

卮擬共還家浣客衣愧失養生收一溉笑

擒夢豎竄三危大槐安國休重省兜率陀天尚緩歸

樂天

詩歸則須
歸兜率天

一病一衰秋後雨

舊語老一病一衰秋一雨一涼

孰言之武

老能為

赤明鑰篆正恢台戲挹雄風滌悶懷病骨喜隨新籥換

好詩忽餽寶珠來巨魚未縱王褒瘞陋室聊淹禹錫階

昔痕工
附錄

且共理身如理國小須握手詠康哉

再和前韻

為乏刀圭飲卯卮

見魯直語

黃庭空想衣朱衣三田未遣三

彭去九軌幾成九折危瘦骨可能支夜永醉鄉那復挽

春歸亦知有客真佳甚握手還須笑樂為

若時風雨候三台憂國豐年幾入懷執戟未愁方病死

閉門惟喜子桑來人間宰相真如夢

事見類說

天上羣仙詎

可階事業鏤冰何所有之乎者也矣焉哉

轅門怒髮羸肩庖計相當年笑解衣誰識英雄千古意

肯論性命一絲危伏波卧看飛鳶墮杜曲生憐獨鶴歸

自愧此身成落空搔種種欲何為

遂初惟許賦天台牆月東邊漫古懷雖乏平泉供宴樂

幸尋荒徑愜歸來蹒跚愧我無金汞蹤踐看君上玉階
傍舍數弓畦藥本聊支晚歲亦優哉

難追八駿舉瑤巵肯向羅浮闕綠衣敝服真成原憲病

枯枝幾賦仲堪危

既仲堪與客戲作危語云百歲老翁扳枯枝盲人騎馬臨深池

忘憂

擬問酒中聖覓句懶從天外歸笑傲桑榆知有幾春秋
敢以大椿為

茂先博物惜星台世味沉酣酷鴆懷風月自為無盡

闕

湖山誰肯愛閒來競知疾下多車乘豈悟幾危踏屢階

幸與樂天相伴住休論達者謂何哉

送姚提幹行

虛齋鎮東鄞從之南容君我初未之識邕翰傾殷勤修
潔以博習秀美而有文玉犀映秋水英辭湧春雲雞距
角魯蜀昂然鶴非羣晤言到聖處商也樂所聞最喜直
而義壯音駢鼓鼓告子少於孟先策養氣勛牛山木信
美謹勿容斧斤助苗固得槁可使稗不耘觀子所植立
真能張吾軍仁義可效治淵源在河汾詩書自師友芝

蘭足膏薰剛風接勁翮去去翔霄昊清時有聞者必也
吾子云

和德天治中林宗翰雪詩簡黃制卿

齋壇將禱肅熊貔一縷忱恂六出奇雲欲商量先警路
雨方收卷避催詩冰花肯效梅粧額風絮嫌隨柳獻眉
鹽虎玉龍莊語在顧光遠業瑞昌時

古風一篇簡徐德夫提刑

昌黎有名言受恩異知己而况不識面知心詎能幾浮

雲日多變，交道冷如水。擠水遽下石，利害毫髮比人情。
易燥濕滯，潏發九軌終。然風雨晦，鷄鳴獨無已。世變方
下趨，特立繫君子。山谷未見坡，氣味已相似。希文非素
交，永叔甘遠徙。敢謂世無人，前修可專美。我昔聞君名，
恍如讀青史。已乃知同時，深心愛敬起。端平濫持衡，薦
賢職當爾。並以聞九重，夜半下一紙。雅志樂弦歌，公車
猶足止。賢者固難進，奪情辭詔旨。知賢未及用，上印返
田里。閒居事幽屏，黜陟不到耳。賓朋有公言，聲徽振商

徵入則裨國論挺挺中流砥出持皇華節光風汎桃李
從容五六載平進付常理又聞交游間榮落保終始不
負楊臨賀真見其人矣夜夢加晝思髣髴眉宇紫軍將
忽打門緘書炤窓几風簷屢開闔襟期頓清泚有時嶧
陽桐知音發妙旨高情激孤笑新意償宿喜得一夔已
足失百參何恥老我豈私賀善類知有恃看君廣廈間
大庇天下士

簷前蜘蛛

如吞吐緯自縈纏出沒無蹤屋漏邊懷毒滿身如蝎大
漫張羅網欲漫天

安晚軒竹

松號大夫交可絕梅為清客志相同英英鳳實卑餘子
楚楚龍孫過乃翁晚際一弓橐素月暑中千斛糶清風
小軒政欲供晨坐付女遮闌曉日東

安晚園戲占

橫塘雨過水初平浪影窺窓一孔明籬下觸羝無鹿角

林間反舌百禽聲柳公權可送行客梅子真能寬渴兵
誰道夏園無所有蓮花端可做張卿

九日即事

安晚閒身晚更安蛩宵無夢落金鞍通心白髮誰為染
對面青編儘耐看多謝紫萸占老健喜招黃菊伴秋寒
江城借闕生輕暖忽有鳴蛙却為官

窺畦籬戶小園林獨鷗相陪省一琴老眠官年從實錄

貧依國息寄橫金

每從官庫子錢

詩盈弓力猶能寸容值駸辰

且枉尋楓葉自知酤令緩漂搖醉臉出牆陰

童孫競爽祝雞翁點看凡將句讀中戲指丈兄誇少壯

樂天有張大殷兄詩嬾推庾甲問雌雄窮秋對展三更月迴夜傳

呼萬竅風逗曉東窓相管領舉頭灩灩日車紅

題偃谿間長老克民擊壤圖

炊煙萬井著僧居人在康衢畫不如寄語偃谿揮淡墨

圖中添我一柴車

謝林治中訪別覺際菴

野服芒鞋踏蘚斑千峰約飾整雲鬟山行陡覺精神健
老去雖貧耳目閒步武來尋僧舍舊話言應想夜窗閑
錢湖難買歸舟駐料得春衫憶素蠻

正月晦夕夢中作偈覺但記其首兩句遂於枕上
足之錄呈慧上人

是身本虛妄覓主了無得誰知日用間顛倒由六賊茫
茫前後際生滅在空色賊去主人歸渾家不相識

因筆記賊入空室頌

平生一片癡妄意室中物自言富可待到了貧徹骨一
宵入人家百寶認彷彿揀得真金身明處是泥佛

乙巳三月出湖口占

歲朝花片落書奩未信春光已屬厭猛省清明今日事
家家青柳壓朱欄

又

曉日殷勤為看鞭微風逐旋約輕烟東皇景勝渾如舊
西子穠濃喜近前檻外客山今對展禊時朋酒占初筵

十年重訪蘇堤柳總付春光入畫船



兩宋名賢小集卷二百三十一

欽定四庫全書

集部

兩宋名賢小集卷二百三十八

詳校官中書臣孫溶

助教臣常循覆勘

總校官編修臣王燕緒

校對官學正臣周鉉

謄錄監生臣張椿

欽定四庫全書

兩宋名賢小集卷一百三十二

宋 陳思 編

元 陳世隆 補

安晚堂詩集

鄭清之

冬節忤寒約客默坐燕品字柴作五禽戲體中差
小佳園丁以矮梅至如見東郭順子使人之意也

稍欣然呵筆手凍筆占數語呈劉菊坡傳一笑

少日愛花螽趯趯老去凍蠶已休織水村山郭一枝曉
忽到窗前三歎息年年雪裏自作春揠手東皇不相識
衣冠古岸綺季至介冑嶙峋亞夫色從來魏證真嫵媚
要是廣平終鐵石月香水影兒女語千古詩腸描不得
笑馮與可幻竹君相對無言面深墨

再和

雪毛舞風學嚶趯凍落天孫碎雲織玉肌不粟彭祖方

戲挾奇芬笑安息生憎萬花肯同調嘆點壽陽聊半識
結根不向青桂宮絕交月姊無難色誰能柔此老強項
朝暮隆隆轉媧石春風為媒嬾結子來訪苔痕娛夢得
人間要覓爾許清語渠肉食乃無墨

又

滕六附暄墮寒力六花未辨天機織薜蘿老盡蘭始芽
凌波仙子方踵息水邊亭亭逢玉人照眼縞衣如舊識
冰霜相與厲貞操蝶蜂那能犯莊色聽渠吹笛作商聲

正音滿地出金石菊坡為索孤山詩好句新從坐中得
二君聯壁如長城笑整雲梯再攻墨

牡丹嬌春醉無力艷紫妖紅錦城織鹿解銜花空誤唐
楚以姬歸竟亡息何如野外挺孤操照水淵然有深識
昂昂雪鬢顏真卿何物女子稱國色主張繁華勿復言
如對鴈門二千石語君欲識梅花面好向雲巖訪拾得
語君欲作梅花詩磨盡蓮經大千墨

菊坡筆挽千鈞力剪就冰綃出蛟織謫仙笑作揚州詩

鵬賦消搖六月息市門聊學子真隱下坐還從季野識
清標自是孤山姿嬾眠唐家六宮色芒端琢句貌疎影
竹邊着渠牛礪石枝橫帶雪最佳處近水清寒月先得
語梅政可兄涪翁凍雨涪溪打碑墨

謝鄭廣文和韻

春工漚絲呈功力紅日如梭萬花織愛花蕩子不愛命
效死驪姬似荀息草木搖落天地閉賢哉梅也衆不識
靈根九轉列仙品千古離騷作書色漲晴癡暖動山意

攀翻健倒蒼苔石高標底須雪後見清芬每向閒中得
花前失喜廣文詩柿葉書成點新墨

廣文出新意得梅之全花實根葉譜入秀句輒效

反騷一章

東風不借半分力老樹絲窠冒寒纖虛枝生白獨也正
夜氣歸根吹以息箇中灑灑無一塵無眼界至無意識
居然暗發定慧香不取諸相了空色若與此花論相好
是人如以木鎖石我嘗聞之老瞿曇無有少法為可得

我詩當以無耳聽索梅一笑付繩墨

再和

青藜不解支脚力機杼微聞隔隣織暗香來處窮幽棲
蹇驢崎嶇牛喘息山中欲訪隱君子等閒未許李邕識
同盟頗笑五大夫晚節汙秦有慙色摩挲寒玉古苔蘚
從渠喚作荆山石雪中索隱非行怪自是花間着不得
直須謫仙蘇二來溪藤快掃如鴉墨

雪意賈寒欺酒力思婦嬾學迴文織屏山未合篆痕銷

笑倩南枝陪燕息冰絢絳闌入纖手素臉殷拊未真識
兒癡認作春風面剛道杏花欠顏色香浮紫帳夢欲醒
影到窗紗月移石為梅着語將無同左袒孤山未為得
吳都誇麗逸此士十年浪費老倉墨

吳都賦桃松竹而不及梅

和趙靜樂梅韻

伊初作春私帝力司花女課千機纖月四十五以為功
化工何嘗停半息老梅偃蹇傲衆芳一錢輕視程不識
和羹肯為媚竈計望林祇笑欲炙色莓苔被服當文繡

冰雪定交過金石靜樂先生大雅韻始信清名不虛得
政須草聖傳新篇安得張顛首濡墨

司寒駕天騁勢力凍合冰蠶不成織皮膚皸瘃雪滿衣
真人恬漠與道息一花挺出萬木僵其友松筠乃能識
清香遠到惟德馨素質自持無異色春風着意媚衆卉
用物精多老僉石老紅飛盡密房深佳處暗為蜂翅得
誰知竹外一枝好千載垂芳在詩墨

菊坡疊遣梅竹忽惠蘭芽此變風也敢借前韻效

楚詞一章以謝來辱

霜雰雰兮風作力草變衰兮蛩罷織思秋蘭兮委蕭艾
望郊丘兮聊止息悵佳人兮既遠紛吾笑兮誰識忽有
人兮好修遺予佩兮春色茁瓊芽兮九畹帶杜衡兮被
石凜增冰兮薺薺杳光風兮驟得卜蘭居兮南坡拂余
龜兮食墨

和趙大監知宗韻

萬里修程占學力色絲黃絹新組織只今下筆追二雅

端如養氣閑千息公子何自知寒梅須知三長具精識
亭亭玉雪瑞煙曉愛日香浮綵衣色自然雅韻出天姿
芝蘭那肯羨元石我慙嫵節對俚語吹沙鏤冰竟何得
願君寫入遂錦堂冷蘂疎枝陪淡墨

再和韻簡菊坡

訪梅長與寒角力兩鬢絲絲尚堪織弔湘賦鵬強解事
長沙少年空太息酷愛孤芳支歲寒草木雖多嬾求識
肥遁不為蒼帝臣白賁丘園義形色風餐雪虐真養素

笑枕溪流漱寒石請翻橘頌作梅賦倍覺風騷楚人得
請翁試為決然疑謂余非是甘飲墨

昨雖移韻於蘭然石鼎聯章不可亦不成也再賦

一則語以殿衆作亦騷之亂詞云

好惡移人信有力宮姬尚取崑崙織

晉書織室
崑崙奴事

剛姿未

必廣平愛皓首誰憐趙岐息夷車衡荏蓀芷荃富矣離

騷誇博識靈均橘頌不及梅內白孰為有精色夫何卜

玉楚見棄素瑩無乃砭砭石梅古賢人又何怨伯夷正

是求仁得氏以墨胎端自汙請效公翰為削墨

續詩愧無修綆力意緒中斷軻母織棹頭吟坐欲成寐
出吻非鳴方願息君詩愛梅筆不停四疊陽關人未識
冰壺交映雪同調秋水為神月爭色翛然未肯第山礬
介如何必化松石詩壇置韻百夷姓敵壘收功劇孟得
須君為梅作佳傳問事玄冥煩史墨

再和靜樂

夫君論事回天力斯文如貢厥篚織天葩瑞時來帝傍

天香染衣未渠息因攜天上白琅玕散作天花天女識
水清誰似乃翁譽玉闕
狹視寧馨色月中疎影射銀漢
雪裏櫻枝護槃石望林笑策蓋世勛萬戶侯封為公得
吹徹樓頭畫角春十行朝拜睿思墨

靜樂用元韻為勸學之什再和

士惟食志非食力於陵奚事親屢織靜樂一門自師友
簞進不為子貢息元仲季方從太丘海內人士俱願識
案上惟作羽籥聲陸龜蒙室中定無鉏耨色申旦督課如

園蔬子夜程書過衡石舉似翁嫗答其兒教育英才笑安
得文獻超羣王謝家韋布當磨鐵硯墨

再和梅韻

北窗夢覺呼一力曙鳥微聞絡緯織推窗宛見野梅面
帶雨猶如看花息堅白雅佔南枝先淺紅留待北人識
宮中自是憐玉奴天上何為愛藍色

虛杞仙
游事

肯隨蘭芷

媚屈宋獨立芙蓉笑丁石愧我聯篇蟻空旋羨君六博
梟已得梅嬾作尉竟仙去拜官無用斜封墨

再和勸學韻

仕學優於服田力公儀之家廢葵織詩書為府道德林
樂在藏修洎游息濃薰班馬有餘香暗摸曹劉豈難識
插架牙籤映隙曛近竹芸編侵晚色諸生競詫邊腹笥
正音如聞孔堂石從知車馬自稽古須信熊魚可兼得
四科褒進惟尚賢欽想昌黎方讀墨

和葦芷雪韻

冰山鑿碎五丁力散作席花誰捆織射鵬人去飛燕寒

擁衾內視方閑息能令赤鳳冒白羽夜半翱翔天際識
白雲鄉中助劇戲從以萬妃紛玉色鸞沼乍驚舞明鏡
虎塩未見蓋危石乍離還合紛總總已定復飄如得得
姑置是事先年豈有突不黔應笑墨

夸父逐日有餘力驅萬白蜺飛練織連天照耀作夜明
湧池培植堆驚壤息竹高已學搶頭勢梅近猶能半面識

坡翁笑效六一翁八章聯翩韻聲色

坡效歐公白戰體
以聲色氣味富貴

勢力韻麻衣忽見蜉蝣陣硯池觀魚來紫石鄭谷祗解
作八章

瘦寒句江上魚蓑正披得何如囊錦生縠紋兔園老筆

陽春墨

毛東堂兔園老筆生
陽春墨範不待微和扇

再和雪韻

司冬已窮造父力寒機墮指曉猶織長安貴人金屋嬌

琉璃屏下方偃息

楊國忠事

穿窗入幕兒女笑喚作楊花元

不識明珠照乘月午夜秋水連天雲一色翻編新詩出

退之撒鹽戲語欺安石一寒最憐東郭士履穿踵決行

不得自喜猶為孔子徒且學顏淵食炊墨

適得酒蛤頗佳遣餉菊坡因記曾作蛤子詩有文
身吳太伯緘口魯銅人之句戲綴前語代簡

文身太伯甘斥鹵緘口銅人舌微吐借資墨客富濡沫

鹵乃墨
魚之沫

骨醉昏香登燕俎半熟含酒老饕賦此翁僅可

闕堂戶班班雋永帶神液入室真味翁未覩菊坡風裁

黃豫章如食蠟蚌江搖柱盤餐盡廢太瘦生格遠調高

自清苦子蛤遣汝到眉按努力去為酒中虎

諺稱海
醋鹹者為
捉

虎末下醎豉有何好猶侶尊羹傲倉父海之介夫此小

兒雞肋見笑楊德祖前身誰作水解仙飛入珠宮飲甘露能令齒叻策餘烈一鼎松風漱寒乳

閒中口占五絕

眼欲觀書身欲眠斜拖黃卷曲肱邊不須身眼爭然否
試待醒來問孝先

雨多愁麥又憂苗不雨還憂旱火驕憂國浪愁端是苦
老天那肯病唐堯

杏桃結子已成翁稚綠中間着老紅階藥元來如許壽

麥秋天氣露春工

見說烏蜂不採花
羣飛啄蜜喙如鴉
雖然冗食真堪汰
笑語園丁且放衙

春魚潮罷捉洋山
數水冒船素手還
海若想應饕餮更甚
飽鮮無復到人間

近海魚
絕少

到龍井寺

竹門斜倚酒家帘
石路高低記水簾
炙背老農驚偃偻
乘肩癡女笑窺覘
數羈人立攀籬落
一蝶兒嬉掠繖簷

款約朋從歸去路馬頭應有月纖纖

春園古寺綠周遭一閣軒騰面勢高
爐篆得鄉抽露秘石泉借茗作雲濤
風流二老歸靈鷲筆墨千年續楚騷
拙語留題罨珠壁暗中摸索愧劉曹

底忙不肯訪禪林山寺何曾避客深
奇石韻高非令色老松皮脫見真心
簷牙徇鐸關幽事溪曲無絃出妙音
拂拭少游碑好在姓名曾記落碑陰

十里輕軒憩佛廬夢身差記蝶蘊蘊
伊蒲巧作魚蝦樣

矮筍新饒繭粟株暫到欲陪僧夏靜等閒生怕俗塵汙
計然老去翻多事空挽西施向五湖

孟童子中異科而還來訪余於行都賜第輒贈以
詩

在昔昌黎公序贈張童子獨出超等夷芳名駕青史君
門藹世勲負軼西平李宗社方同休彪炳見狹稚天庭
插犀角星眸炯秋水誦書如焦琴高下涵角社朱門共
駭聽洗此箏笛耳老翁欲答兒眼看拾青紫一朝聞九

關賚予出周籬我朝晏與楊炳炳貴名起願子志遠大
勤學踵前軌家尊我相知作詩贈歸騎

兩宋名賢小集卷二百三十二

欽定四庫全書

兩宋名賢小集卷二百三十三

宋 陳思 編

元 陳世隆 補

安晚堂詩集

鄭清之

林治中鄭廣文以詩來遣魯酒報聘拙語輔行

長公本喜飲半入野人腹南州春夢安亦復開醉目行

想晉流麗鼈飲更升木興來索老兵誰謂酌可獨我亦
愛客至陶巾時一漉雖有彭澤田種秫若不足頗因病
入務瓢棄尚餘綠豈無大雅朋來伴離騷讀廣文梁簷
花和靖峙修竹交情如酎醇秀句喜心沃觴政嘗卜夜
談聞屢更僕何為闊芝宇但憶顏山玉聊爾遺書瓶安
得洗愁斛昔誇聖人中今愧平原督今歲家釀殊未佳杯手助
持螯車涎笑逢麴青州豈烏有白衣問黃菊如臯應解
顏對酒頗勝俗梅聖俞詩獨坐與婦飲頗勝俗客對何時赤壁游匏樽笑

相屬欲歌鹿鳴三正苦龜藏六飲肯遺公榮雨煩遇御
叔忻聞麥雨岐况有魚百族小卻揖二豪觥船倒醺醪

謝玉泉君黃伯厚和韻

卯飲貪引卮夕食不厭腹松醪艷玉池鬱尊傲黃目歸
閒喜攜幼欣榮對夏木頗笑屈原醒寧甘馬周獨詩固
發豪思江月欲戲漉每廢北海詠未羨西隣足槽規長
吉紅蟻玩杜陵綠醉鄉擬續記書眼瞭可讀時康萬戶
春興到七賢竹筵虛艷姬舞面想宮嬪沃別腸驅藥使

欽定四庫全書

卷二百三十三

健筆命騷僕居然得良朋清辭瀉壺玉習池可聯乘步

兵有餘斛

步兵厨有酒三百斛

誰能酒限拘強效八州督今年小

麥好豈屑官廩勸嘉節迫蒲艾早計數萸菊客中真有
佳眼前喜無俗賦殷金石聲光粲斗斗屬句在後三三
誰能賽六六試編諸賢詩第以伯仲叔共成杜康傳更
聚山中族萬事付亡何乾坤一杯醪

諸君和篇摩壘致師不容閉壁再繹前韻

平生周伯仁耿耿空洞腹翛然猿鶴安豈辨鳩鷹目僕

射不解事居士偶題木種柳僅成五樂園祇可獨皓首
愧商隱湛恩沾漢漉城府百無有丘壑一已足詎省醉
裙紅安識隊樓綠生經未渠諧酒頌聊喜讀耳熱聞秦
聲浪謂肉勝竹高陽有勅者威氣和曲沃直須殿上飲
撫牀徑呼僕競看梔揮金幾欲斗撞玉方丈食萬錢娉
婷珠一斛豈復堪束帶靡徒揖郡督耆壽祝老饕嘉名
艷春菊乃知梁州菊大勝伯始菊相逢作青眼洗去爾
許俗冷然曲寡和尚有騎能屬元和一漁翁喜共學士

六兵飲間雅奏楚優效孫叔石鼎夜未央春空雲已族
何當一會期清驩溢寒醪

邨原解劇飲雅名稱龍腹季倫殺為嬉席妓敢嗔目有

酒何容辭恐射蔣濟木但當攜酒去闕名賞幽獨年秣

未足了孔聖米猶可漉杜愛屐憐猩魂奪卮笑蛇足桂

漿有餘芳桑落見重綠諫遠衢尊投法置醕飲讀籌觥

進藪看流觴屏絲竹未憂瓶罌罄但費區鹽沃勝事在

園林家務付兒僕陶淵明傳釀焦截肪乳魚鳳泣脂玉鍊句

丹九轉摘文泉萬斛競詆酒中賢祇堪帳下督穿幘俯

前案障面厭方朔

楊譖語魯漫漢事

吹不落眼花

樂天詩

歸去來

籬菊華胥國遨遊無懷氏風俗登詩壇爭長破愁城相

屬二簋用坎四三容敬需六共樂時方清誰言世之叔

相從孟公座寧別輔氏族

謂鄭廣文也

一笑祝諸賢行醺天

家醪

今內醞上尊扁以醺醪

再和戲黃玉泉

黃公辭酒壚經笥捧便腹讀書飢鳶聲了了崇文目陂

澄萬頃波巢寄一枝木戲題百姓眼自笑孤館獨轍涸
聊相濡神液未容漉嘯歌匪彈劍悵隘殊躋足文纖纖
尊黃句弦綺琴綠不見蟹杯持徒費爾雅讀坐對罌臥
墻空有葉映竹枯腸但茶搜燥吻遲膏沃主人如馬瘦
酒使欠猩僕

封溪
令事

思折酤醕券欲訪義漿玉喟茲鯨吸

量眇矣龍驤斛靈根日灌溉詩課自程督試當閱醫經
薄釀借神燭共醉靈均關未問長房菊飲興非有期衣
曬寧免俗村勺雖不勝嘔泄聽隨屬嬾疊陽春三肯競

梟博六不飲但麥豆頗勝劉文叔醉騎黃犢孫歸玩墨
君族子為評酒名擬號安晚錄

謝葦芷和韻

無詩不言酒

荆公謂李白無一詩不言酒

作賦真誑腹未破公子慳

况與佳人目壯心思擊壺聖杯賡啄木

樂天啄木曲不如飲此神聖杯

袖想胡旋雙粧託揺手獨

見陳陶獨揺手行

賓筵乏酬獻醴齊

催涕漉襴衡辨撾鼓元宗方病足曾無列屋粉空韻梳

鬟綠百篇謫仙詠十軸蒙溪讀

見顯雲池陽醉歌

有美建安璩

競爽淇園竹芒端寒燠轉胃次古今沃卧甕嗟舍郎祭

酒可令僕

漢僕射中興改祭酒

時陳南北洗頗醉東西玉雖微醺

五斗端有才一斛詩壇長齋盟筆陣嚴總督方將喝銀

雲未肯平封翹

李賀酒酣喝月使倒行銀雲櫛櫛搃宮殿明陵龜蒙中酒賦拔酒樹平翹封

宮

宴看傳柑帝歌須和菊

德宗作黃菊歌翰林學士韋綬奉和

牛心固異饌

犢鼻且同俗尊酒日相逢我歌君為屬歡期踐三五釀

頃戲十六

樂府庾信對酒人生一百年歡笑惟三五玉續有田十六頃悉以釀酒

酣暢嗟

阮修飲狂謝裴叔

裴叔則語石崇云飲人以狂藥責人以正禮

窪尊留古製

長勺分魯族居然同老襟淺斟醺水醪

湘東有醪水故酒得名

謝鄭廣文和韻

鱸堂心醉經精神應滿腹溫飽無所志飲食不以目

溫公

謂今人以耳而食

說詩稱解頤善問待攻木頗愁百斛量

孔庭惟立獨俎豆答衛問筐篚欠鄒漉

見鄒陽酒賦

曾子非

養口漆園且尊足時於清夜分酌以翠勺

綠尊翠勺為君斟酌

聊澆磊砢胃不廢吾伊讀每篇亦作句

來詩每篇必作語

如

對紀書竹相逢蓋初傾一別桑重沃融尊慙生滿魯醜

疎拜僕衛生不自實抑首新患玉囊無訣墓金米乏佳
傳斛厨烟爨人清蔬課園夫督粟鉞收秣田黍釀用陰
麴解同杜陵襟期醉昌黎菊赤手當縛菟

來詩有白戰之語

白

眼漫嗔俗莊虛左氏晏觴肯西子屬

坡賦屬此觴於西子

酒債負

尋常會期遭百六要須中聖賢庶以展伯叔

謂宗盟也

醉入

無功鄉醒豈屈原族

漢徒屈昭景大族

岸幘一笑粲共賦醺酒

醺

晉張載有醺酒賦

雨中即事簡二友

怒蛙頻作灌夫罵老鸛惟聞莊舄吟麥熟只應呼快活
林間欠此一聲禽

舉頭但覺雲頭闇移脚何曾雨脚乾衣袂未便時衣褐
薄寒渾作晚秋看

鳩能喚雨復呼晴日日長從屋角鳴晴雨不應關汝事
強饒脣舌效君卿

五月炎天正及時輕絲扇子未曾持殷勤寄語班姬道
只恐秋深却夢伊

籀龍厭俗託孫兒

隣竹過牆

隔砌相過人不知借宅敲門太

多事匡牀竟日對漪漪

鶯聲求雨亂縹車兀坐翻思二客佳乞得晚晴紅照水
南坡東畔月侵階

客有誦袁蒙齋得雨酬倡之什輒賡元韻志喜也
呈虛齋使君

雷伯四月唐無聲鳴鳩呼婦鳧浴晴星如撒沙燈吐焰
羲和駕鞭乘赤明稚秧針水未入種秀麥浪畦猶督耕

香車不動百龍蟄轉漉如織千蛇橫愛民太守心語口
瘡我以早寧無生川靈有知龜亦許異物蜿蜒歸掌撫
一雨果從方寸來此念端誠本天與但看父老歌豐年
不用兒童學皇舞弭災肯效藥巴噉哺民無異紫芝乳
一年事在阿堵中四封笑溢迎門語我州瀦野同淮徐
公方有意六輔渠上天下澤鍾惠施千里波及皆君餘
蒙齋詩成虛齋和我樂賦之如遂初坐對聯珠飽官粟
但有歡喜無歎歎祇今快續二賢詠不須乞米與顏書

又

媧石補天玻璃聲遇坎為雨離為晴金烏玉兔旁午出
百二十官稱常明下土臣敢再拜問誰主風雨催民耕
天江津河尾北見玉井水漿參左橫何為湯旱龜土圻
何為堯水魚頭生孰令赤地星丈許吭扼雷公仍背撫
孰令河鼓塞銀潢勺水線流不輕與孰令捲舌自張翕
孰令天雞自飛舞雲師族聚曷遽散電母兒號奚不乳
黑豬渡河去無迹蒼龍銜珠噤弗語朱鳥崛強王偃徐

烏龜縮頸老沮渠
夫君戕天帝馮怒
旱魃磔死不問餘
天街清潤聯珠璧
不為乾封為太初
一雨三日誰力歎
更唱迭和忘欵歔
歸之太守不肯有
欵乃聊代志喜書

又

泰龍作醢龍吞聲
天公憤憤迷雨晴
玉脂泣烹足媚嫵
苦酒五色生光明
龍雖神物畏饒吻
攜朋去作天田耕
稚禾婉婉魚薨立
高原庚庚龜兆橫
漢家燮調豈無術

陰陽縱閉歸董生

闕

我貧自笑一瓢許
瓶粟屢空慙
釜與彭澤從無種
林資
沂水聊助詠
雩舞頗怪吹雲
讀風頌浪愁
浙米緇危語
清時何事洪年
烹善政端無
寧虎乳仁人
拯溺非姑徐
亟挽天漢如決
渠我知造物
識君意十日
一雨焉取餘
願君展此作
霖手蘇民旱
從扶黃初在
在京抵賦高
廩
坐令歌頌笑
欸歔病坡作
計羹玉糝
辟穀寧羹黃
石書

湖上口占

賣葑千艘底處藏
媧天濯熱卧湖光
山雲既雨猶相逐

水草無花亦自香
野徑徧穿人借問
僧茶旋點客先嘗
翻思舉世趨炎者
誰識蘋風五月涼

戲續前韻簡幕掾林治中

梅林妬日強遮藏
西雨東邊漏隙光
黃口禽鳴應乳臭
白花梔坼似荷香
排根荷出憐嵒嵒
紹遜迹尊肥晒孟嘗

後湖之後荷
尊間有在者

閒處便成清境界
底須沂水羨雩涼

煮白酒送林治中

長門思客薦寒泉
浪讀松醪桂酒篇
數米釀來成玉液

傳家方秘出金川白飛瓊瑩應歸重紅滴珠槽敢忌前
聊遣朋壺共一笑平分風月晚涼天

偶成呈林鄭二友兩絕

人才百年能幾見俗子一揖已累人元溫亦知有此客
德操未省誰為賓

聲名谷口我宗秀風調西湖我輩人自是山巖着不得
天教暫此伴閒身

旌德觀

瀛丈移從弱水間
君恩泮魚得躋攀
茗香壺酒成三事
巾褐枝筇佔獨班
境勝亦能充道勝
官閒何似在家閒
元都猶有桃花在
更向西湖訪好山

綠叢青笠慣孤蒲
錯認東湖處
士居舟尾笑迎車
後客渡頭催買網
中魚水程趣戍半
規日山意論文千
卷書歸去重樓試
凝望恍曾雲氣矗
凌虛

又

半生東甬數間屋
一日西湖十首詩
回首風光少年客

春山擁翠作蛾眉

賜第登樓

避俗懶成癖登樓睡失魔忘機鷗自下開檻蝶相過高
處景差勝靜中春更多君思欲以報歸夢欲如何

又

桃李漫山不是春紛紛蜂蝶趁游人梅花已帶春歸了
分付垂楊浥露塵

病思歸心走兔近自嗤幻境未渠忘并州便作咸陽看

說若乾桑亦故鄉

觀王導傳作

江東老子惠之和九錫牛車愠蔡婆不殺伯仁君信否
澹然推分意如何

閒中偶成

病覺身名小閒知日月忙篆香雲四合盈篠竹千章慧
性乾成障愁懷弱未張何如莊宇定虛室自天光

春過日初永睡餘日未收露花心翼翼風葉喜沾沾殿

欽定四庫全書

兩宋名賢小集
卷二百三十三

十一

後蜂尋穴懷歸燕語簷隨陽在何處落絮點疎簾

兩宋名賢小集卷二百三十三